

CONVENIO ENTRE O INSTITUTO GALEGO DA VIVENDA E SOLO (IGVS) E O CONCELLO DE MONDOÑEDO (LUGO) PARA A CONCESIÓN DIRECTA DUNHA SUBVENCIÓN DESTINADA A FINANCIAR UN PROGRAMA DE CATRO ACTUACIÓNS QUE CONTRIBÚEN A MELLORAR AS CONDICIÓNS DE ACCESIBILIDADE E MOBILIDADE NA ÁREA REXURBE DE MONDOÑEDO. C-IGVS01/2024.

REUNIDOS

Por unha parte, Ángeles Vázquez Mejuto, vicepresidenta segunda e conselleira de Medio Ambiente, Territorio e Vivenda, en virtude das atribucións que lle confire o Decreto 66/2023, do 14 de xuño, do seu nomeamento (DOG nº113, do 15 de xuño), na súa calidade de presidenta do Instituto Galego da Vivenda e Solo (en adiante, IGVS), segundo o artigo 4 do Decreto 97/2014, de 2 de xullo, polo que se establece a estrutura orgánica do IGVS (DOG nº 147, do 5 de agosto).

Doutra parte, Manuel Ángel Otero Legide, alcalde do Concello de Mondoñedo (Lugo), cargo no que tomou posesión o día 17 de xuño de 2023, na sesión constitutiva da nova corporación resultante das eleccións locais celebradas o día 28 de maio do mesmo ano.

EXPOÑEN

Primeiro.- Que, de acordo co establecido no artigo 3 da Lei 3/1988, do 27 de abril, de creación do IGVS, ao devandito organismo correspóndelle a realización das políticas de vivenda e solo da Xunta de Galicia, a fin de garantir os dereitos constitucionais a unha vivenda digna e adecuada.



O artigo 5 a) do devandito texto legal dispón que para o adecuado exercicio das súas funcións, o IGVS poderá, de acordo coa lexislación autonómica aplicable, subscribir convenios de promoción e xestión con outros organismos e entidades, en especial, coas corporacións locais.

Segundo.- Que, de conformidade co establecido tanto na Lei 7/1985, do 2 de abril, reguladora das bases do réxime local como na Lei 5/1997, do 22 de xullo, da administración local de Galicia, os concellos, para a xestión dos seus intereses e no ámbito das súas competencias, poderán promover toda clase de actividades e prestar todos os servizos públicos que contribúan a satisfacer as necesidades e aspiracións da comunidade de veciños.

Terceiro.- Que a Lei 1/2019, do 22 de abril, de rehabilitación e rexeneración urbanas de Galicia, configura a rehabilitación e a reutilización dos espazos residenciais abandonados ou degradados, xa sexa nas cidades, nas vilas ou nos núcleos rurais, como unha solución eficiente, sustentable e de futuro á hora de dar resposta ás necesidades de vivenda da poboación, así como un instrumento eficaz para a conservación do patrimonio construído. Nestas actuacións, a intervención pública resulta fundamental para impulsar e fomentar a recuperación do construído.

Cuarto.- Que, mediante Resolución do 17 de febreiro de 2020, a Dirección Xeral do IGVS fixo público o Acordo do Consello da Xunta de Galicia do 13 de febreiro de 2020, no que, ao amparo da Lei 1/2019, do 22 de abril, se declarou área de rexeneración urbana de interese autonómico ao conxunto histórico de Mondoñedo e unha zona contigua de características similares. Dita declaración levaba consigo a necesidade de redactar un plan de dinamización no que se indicaran as actuacións a realizar tanto en materia de rehabilitación de vivendas e protección do patrimonio cultural como as destinadas á revitalización integral do ámbito. Pois ben, mediante Resolución da Dirección Xeral do IGVS do 5 de marzo de 2021, fíxose público o Acordo do Consello da Xunta de Galicia do 25 de febreiro de 2021, polo que se aprobou o Plan de dinamización elaborado, para os efectos indicados, polo Concello de Mondoñedo.

Quinto.- Que, en virtude do exposto, o IGVS está interesado en subvencionar o programa de actuacións que o Concello de Mondoñedo, segundo a memoria



explicativa e xustificativa que lle remitiu o 10 de outubro de 2023, ten previsto realizar para mellorar as condicións de accesibilidade ao seu conxunto histórico.

Sexto.- Que o artigo 26 da Lei 9/2007, do 13 de xuño, de subvencións de Galicia, regula o réxime de concesión directa de subvencións, establecendo que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables, de conformidade co disposto na citada lei.

Así mesmo, o Decreto 11/2009, de 8 de xaneiro, polo que se aproba o regulamento da Lei de subvencións de Galicia, establece no seu artigo 40 que a concesión directa de subvencións nas que se acrediten razóns de interese público, social, económico ou humanitario, ou outras debidamente xustificadas que dificulten a súa convocatoria pública poderá instrumentarse a través de (...) convenio que, en todo caso, deberá axustarse ás previsións contidas na Lei de subvencións de Galicia, salvo no que afecte á aplicación dos principios de publicidade e concorrência, e conterán, como mínimo, os seguintes extremos:

- a) Definición do obxecto das subvencións, con indicación do seu carácter singular e as razóns que acreditan o interese público, social, económico ou humanitario ou aquelas que xustifican a dificultade da súa convocatoria pública.
- b) Beneficiarios e modalidades de axuda.
- c) Crédito orzamentario ao que se imputa o gasto e a contía da subvención, individualizada, se é o caso, para cada beneficiario se fosen varios.
- d) Compatibilidade ou incompatibilidade con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.
- e) Prazos e modos de pago da subvención, posibilidade de efectuar pagos anticipados e abonos a conta, así como o réxime de garantías que, de acordo co disposto neste Regulamento, deberán achegar os beneficiarios.



f) Prazo e forma de xustificación por parte do beneficiario e, no seu caso, da entidade colaboradora do cumprimento da finalidade para a cal se concedeu a subvención e da aplicación dos fondos percibidos.

g) Obrigación do reintegro, total ou parcial, da subvención ou da axuda pública percibida no suposto de incumprimento das condicións establecidas para a súa concesión.

h) Obrigación do beneficiario de facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións.

Polas razóns anteriores, as partes comparecentes acordan formalizar o presente convenio, o cal se rexerá polas seguintes

CLÁUSULAS

Primeira.- Obxecto

O presente convenio ten por obxecto regular o réxime de concesión directa dunha subvención do IGVS ao Concello de Mondoñedo por un importe de 133.510,94 euros, coa finalidade de financiar as catro actuacións descritas na cláusula terceira, a cales contribuirán á mellora das condicións de accesibilidade e mobilidade na área Rexurbe de Mondoñedo.

Segunda.- Xustificación da concesión directa da subvención a través de convenio

Este instrumento convencional formalízase ao abeiro do artigo 19.4.c) da Lei 9/2007, de 13 de xuño, e do artigo 36.c) do Decreto 11/2009, do 8 de xaneiro, que a desenvolve, e terá carácter de subvención de concesión directa por mor da súa singularidade, así como polas razóns que acreditan o seu evidente interese social, ao tratarse de catro actuacións que están dentro da área Rexurbe de Mondoñedo



destinadas a facilitar a accesibilidade e mobilidade á dita área Rexurbe, concretamente, ao seu conxunto histórico.

Terceira.- Relación de actuacións subvencionadas

Mediante este convenio concédese unha subvención para financiar catro actuacións que contribúen a mellora das condicións de accesibilidade e mobilidade na área Rexurbe de Mondoñedo, concretamente, ao Conxunto Histórico da Cidade de Mondoñedo, e que aparecen relacionadas e descritas na memoria explicativa e xustificativa presentada polo Concello de Mondoñedo:

1. ACTUACIÓN NÚMERO 1: adquisición do inmovible situado na Praza de San Juan, núm. 1, de Mondoñedo, con referencia catastral 2498001PJ3029N0001FT, por un importe máximo de 40.348,61 euros.

Coa adquisición do inmovible o Concello pretende ampliar o vial, ademais de promover o desenvolvemento dun estudo de detalle para o ámbito da unidade de actuación.

A edificación que se propón adquirir está incluída dentro da área Rexurbe de Mondoñedo e a súa adquisición resulta clave para poder completar a ampliación do Camiño da Valada.

2. ACTUACIÓN NÚMERO 2: Demolición do inmovible situado na Praza de San Juan, núm. 1 e acondicionamento da parcela, por un importe máximo de 39.742,33 euros.

A edificación descrita na actuación anterior, unha vez adquirida polo Concello de Mondoñedo, ten que ser demolida debido ao mal estado de conservación da vivenda e á necesidade de ampliación do vial ao que da fronte. Ademais, debe procederse ao acondicionamento de parte da parcela en estado de abandono e pavimentar a parte da parcela correspondente á ampliación do vial do camiño do Sabelo. Pretendese marcar no pavimento o trazado dos antigos muros.

3. ACTUACIÓN NÚMERO 3: Adquisición de parcela con referencia catastral nº 2601040PJ3120S0001YE, para ampliación do estacionamento público, ademais dos



traballos previos de limpeza, demolición para acondicionamento de parcela como zona de estacionamento por un importe máximo de 38.000 euros.

A alta demanda de espazo para estacionamento no entorno inmediato do concello fai que o espazo de aparcamento situado detrás da Igrexa Nova, que leva dous anos en funcionamento, na travesía de Casas Novas, estea completamente saturado de vehículos dende a súa apertura, especialmente polas mañás.

Para dar resposta a esta situación, o concello prevé a adquisición da parcela sita na travesía de Casas Novas 1 (D), lindeira coa parcela municipal acondicionada para aparcadoiro. Ademais da adquisición da parcela, precísase de traballos de limpeza, demolición de muros de bloque formigón perimetrais, retirada de entullos a vertedoiro e acondicionamento do terreo.

O estacionamento está incluído dentro da área Rexurbe de Mondoñedo, e a súa ampliación contribúe a eliminar os vehículos do Conxunto Histórico de Mondoñedo

4. ACTUACIÓN NÚMERO 4: Adquisición da parcela con referencia catastral nº 2603020PJ3120S0001TE, unha das parcelas precisas para ampliación de vial no proxecto de mellora de accesibilidade da Rúa Rocha de Vélez por un importe máximo de 15.420 euros.

O Concello pretende acometer os traballos de ampliación para a mellora da accesibilidade na rúa Rocha de Vélez, para o que resulta preciso adquirir a parcela con referencia catastral nº 2603020PJ3120S0001TE.

Cuarta.- Obrigas do Concello de Mondoñedo

En cumprimento da Lei 9/2007, do 13 de xuño, do Decreto 11/2009, do 8 de xaneiro, e do Decreto 193/2011, do 6 de outubro, e en virtude do presente convenio, o Concello de Mondoñedo obrígase a:

a) Cumprir todos e cada un dos obxectivos, actividades e proxectos especificados na memoria presentada, adoptar os comportamentos que fundamentaron a concesión da subvención e cumprir cos compromisos asumidos con motivo desta. De xeito particular, obrigárase a destinar o inmovible e as parcelas que pretende adquirir ás



finalidades especificadas. Noutro caso, procederá o reintegro total ou parcial, atendendo aos criterios establecidos no convenio.

b) Xustificar ante o órgano concedente o cumprimento dos requisitos e das condicións, así como a realización da actividade e o cumprimento da finalidade que determinen a concesión ou o gozo da subvención.

c) Someterse ás actuacións de comprobación, que efectuará o órgano concedente, así como a calquera outra actuación de comprobación e control financeiro, que poidan realizar os órganos de control competentes, tanto autonómicos coma estatais ou comunitarios, para o que se achegará tanta información lle sexa requirida no exercicio das actuacións anteriores.

d) Comunicarlle ao órgano concedente a obtención doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, da Unión Europea ou de organismos internacionais, así como a modificación das circunstancias que fundamentasen a concesión da subvención.

Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

e) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ao beneficiario en cada caso, así como cantos estados contables e rexistros específicos sexan esixidos polas bases reguladoras establecidas no convenio, coa finalidade de garantir o axeitado exercicio das facultades de comprobación e control.

f) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

g) Incluír na publicidade e en todo tipo de documentación e información relacionada coas actividades obxecto do convenio e nos lugares onde estas se realicen: "subvencionado pola Xunta de Galicia – Vicepresidencia Segunda e Conselleira Medio Ambiente, Territorio e Vivenda", co seu respectivo logotipo.



h) Proceder ao reintegro dos fondos percibidos nos supostos previstos no artigo 33 da Lei 9/2007, do 13 de xuño, e no artigo 74 e seguintes do Decreto 11/2009, do 8 de xaneiro.

i) Presentar a documentación trala sinatura do convenio e no momento da xustificación parcial e/ou total, de conformidade co indicado na normativa de subvencións.

j) Remitir ao Consello de Contas as contas xerais de cada exercicio, conforme ao previsto no artigo 4 do Decreto 193/2011, do 6 de outubro.

Do mesmo xeito, de acordo co disposto no artigo 40 do Decreto 11/2009, do 8 de xaneiro, o Concello de Mondoñedo terá a obrigaón como beneficiario de facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións.

Quinta.-Contía da subvención

O IGVS concede unha subvención ao Concello de Mondoñedo por importe de 133.510,94 euros que serán financiados con cargo á aplicación orzamentaria 08.81.451A.760.3, proxecto 2017 00008, dos orzamentos xerais do IGVS para o ano 2023 e a correspondente ao exercicio 2024, a fin de financiar as actuacións subvencionadas, subvención que se distribúe nas seguintes anualidades:

ACTUACIÓN	ANUALIDADE 2023	ANUALIDADE 2024	TOTAIS
Actuación número 1	40.348,61 €		40.348,61 €
Actuación número 2		39.742,33 €	39.742,33 €
Actuación número 3		38.000,00 €	38.000,00 €
Actuación número 4	15.420,00 €		15.420,00 €
Totais	55.768,61 €	77.742,33 €	133.510,94 €

O importe da subvención concedida non poderá superar en ningún caso o custo da actuación ou actividade que vaia desenvolver a entidade solicitante, nin o importe



total do correspondente concepto de gasto, polo que no caso de que o importe concedido supere o custo das actividades ou gastos subvencionables, esta axuda reducirase na cantidade necesaria ata acadar o dito importe.

Sexta.- Xustificación da subvención

De acordo co previsto nos artigos 28 e seguintes da Lai 9/2007, do 13 de xuño, e no previsto no Decreto 193/2011, do 6 de outubro, o concello deberá xustificar ante o IGVS o cumprimento da finalidade do convenio, a realización da actividade e o seu custo real, mediante unha conta xustificativa integrada, con carácter xeral, pola documentación que se relaciona de seguido e que incorporará, en todo caso, a certificación da intervención ou do órgano que teña atribuídas as facultades de control da toma de razón en contabilidade do gasto efectuado e do cumprimento da finalidade para a que foi concedida a axuda.

Segundo o disposto no artigo 10 do Decreto 193/2011, do 6 de outubro, no caso de subvencións destinadas a financiar investimentos, a conta xustificativa conterá:

a) Certificación expedida pola Secretaría da entidade local, co visto e praxe do/a alcalde/sa ou presidente/a, relativa á aprobación polo órgano competente da conta xustificativa da subvención na que se faga constar, como mínimo, de forma detallada:

1.º O cumprimento da finalidade da subvención.

2.º Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: identificación do/a acredor/a, número de factura ou documento equivalente, certificación da obra, importe, data de emisión e data de recoñecemento da obriga polo órgano competente. Salvo disposición expresa das bases reguladoras, e sen prexuízo do previsto na letra c) deste mesmo artigo, non será esixible a remisión dos documentos relacionados no artigo 48.2 b) do Regulamento da Lei 9/2007, do 13 de xuño, de subvencións de Galicia.



- b) Certificado de taxador/a independente debidamente acreditado/a e rexistrado/a no correspondente rexistro oficial, no caso de adquisición de bens inmobles.
- c) Os documentos acreditativos dos gastos realizados con medios ou recursos propios e a indicación, no seu caso, dos criterios de repartición dos custos xerais e/ou indirectos incorporados na relación a que se fai referencia na letra a).
- d) Unha relación detallada doutros ingresos ou subvencións que financiasen a actividade subvencionada con indicación do importe e a súa procedencia.
- e) No seu caso, os tres presupostos que se esixen en aplicación do artigo 29.3.º da Lei 9/2007, do 13 de xuño, de subvencións de Galicia.

Segundo o disposto nos artigo 11 do Decreto 193/2011, do 6 de outubro, no suposto da execución de obras por administración, a conta xustificativa incluírá unha certificación da Secretaría da entidade local, co visto e praxe do/a alcalde/sa ou presidente/a, relativa á aprobación polo órgano competente da conta xustificativa, que conterá unha relación dos gastos efectuados con medios ou recursos propios, ordenada segundo o concepto a que se atribúe, con identificación do/a acredor/a e do documento, importe e data de emisión.

Ademais, deberá incluírse unha certificación emitida polo/a secretario/a-interventor/a ou interventor/a de que os gastos relacionados foron aplicados ao cumprimento do proxecto subvencionado.

No caso da execución de obras pola administración poderase imputar os gastos de persoal propio da entidade local.

Asemade, xunto coa conta xustificativa, no caso de opoñerse á súa consulta, deberase de achegar declaración responsable do cumprimento das súas obrigas tributarias e coa Seguridade Social e de non ter pendente de pagamento algunha débeda coa Administración Pública da Comunidade Autónoma de Galicia ou de ser debedor por resolución de procedemento de reintegro, segundo o disposto no artigo 11 do Decreto 11/2009, do 8 de xaneiro.

Tendo en conta a dita obriga, establécense as seguintes datas límite de xustificación, de acordo co principio de anualidade orzamentaria:



-Para os gastos efectivamente realizados durante a anualidade 2023, a data límite de xustificación será o 12 de decembro de 2023.

-Para os gastos efectivamente realizados durante a anualidade 2024, a data límite de xustificación será o 12 de decembro de 2024.

-No caso de prórroga temporal, para os gastos efectivamente realizados durante a anualidade 2025, a data límite de xustificación será o 12 de decembro de 2025.

Cando formen parte da conta xustificativa documentos de gastos de nóminas ou que comporten ingresos á conta do IRPF ou cotas por seguros sociais liquidables con posterioridade á data de xustificación correspondente, o importe destes ingresos ou cotas considérase xustificado coa presentación do documento de gasto, factura ou documento equivalente, en que se reflicta o importe da retención ou cotización devengadas na data de xustificación, quedando a entidade beneficiaria obrigada a presentar os documentos acreditativos da súa liquidación con data límite na primeira quincena de febreiro do ano posterior.

Sétima.- Pagamento da subvención

Respecto ao pagamento da subvención estarase ao disposto na Lei 9/2007, do 13 de xuño; no Decreto 11/2009, do 8 de xaneiro; e no Decreto 193/2011, do 6 de outubro.

O pagamento realizarase previa xustificación do beneficiario da realización das actuacións obxecto da subvención

O IGVS poderá aboar a subvención mediante pagamentos a conta das actuacións realizadas unha vez sexan xustificadas polo Concello de Mondoñedo mediante a documentación acreditativa da súa realización, ou por medio das certificacións correspondentes no caso de realización das obras.

O IGVS poderá realizar pagos anticipados, a petición do concello, que suporán entregas de fondos con carácter previo á xustificación, como financiamento necesario para levar a cabo as actuacións inherentes á subvención. O importe do outorgado mediante anticipo non poderá superar o 50% da subvención concedida nin a anualidade prevista en cada exercicio orzamentario. A concesión do anticipo



realizárase mediante resolución motivada da persoa titular da dirección xeral do IGVS.

O importe conxunto dos pagamentos a conta e dos pagamentos anticipados non poderá ser superior ao 80% da subvención concedida, nin excederá da anualidade prevista en cada exercicio orzamentario.

De acordo co disposto nos artigos 67 e 65.4, c) do Decreto 11/2009, do 8 de xaneiro, e como entidade local, queda exonerada da constitución de garantía.

O libramento farase na conta bancaria de titularidade municipal que indique o concello.

Oitava.- Compatibilidade con outras axudas

Ao financiar o 100% das actuacións propostas, estas axudas son incompatibles con outras subvencións, axudas e ingresos, ou recursos para a mesma finalidade, procedentes de calquera outra administración ou entidade pública ou privada.

Novena.- Incumprimentos, reintegros e sancións

A falta de presentación da xustificación no prazo establecido comportará a perda da subvención e, de ser o caso, o reintegro das cantidades percibidas como anticipos ou pagos a conta na parte proporcional non xustificada, e demais responsabilidades establecidas na incumprimento das obrigas contidas neste convenio, no artigo 33 da Lei 9/2007, do 13 de xuño, ou na demais normativa aplicable, o que dará lugar á obriga de devolver total ou parcialmente a axuda percibida, así como os intereses de demora correspondentes.

O procedemento para declarar a orixe da perda do dereito de cobramento da axuda e para facer efectiva a devolución a que se refire o punto anterior será o establecido no Título II da Lei 9/2007, do 13 de xuño. Sempre que se cumpran os requisitos ou condicións esenciais reflectidos no convenio, o IGVS poderá apreciar un incumprimento parcial e deberá resolver sobre o seu alcance, aplicando a



mesma ponderación que tivera a condición incumplida no convenio e, se é o caso, establecendo o deber de reintegro.

Cando se trate de condicións referentes á contía ou conceptos do obxecto subvencionable, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se é o caso, deberán reintegrarse as cantidades percibidas en dita proporción. Con carácter xeral, se o incumprimento superara o 65% da actividade a subvencionar a través do convenio, entenderase que dito incumprimento é total, e deberán reintegrarse todas as cantidades percibidas e o seus intereses de demora.

Décima.- Réxime Xurídico

En todo o non previsto neste convenio será de aplicación o previsto na Lei 9/2007, do 13 de xuño; no Decreto 11/2009, do 8 de xaneiro e no Decreto 193/2011, do 6 de outubro.

Este convenio ten natureza administrativa, A xurisdición contencioso-administrativa será a competente para o coñecemento das posibles cuestións litixiosas que poidan suscitarse como consecuencia del.

Décimo primeira.- Comisión de seguimento

Para o seguimento e coordinación das accións previstas no presente convenio crearase unha comisión mixta e paritaria na que estarán representadas as partes asinantes do mesmo. Esta comisión, que se reunirá por petición de calquera das partes, será o mecanismo de actuación conxunta para a interpretación e seguimento das actuacións estipuladas no presente convenio, e estará formada por dous representantes do IGVS e dous representantes do Concello de Mondoñedo, designados por cada unha das persoas asinantes do convenio.



Décimo segunda.- Vixencia

O presente convenio estenderá os seus efectos dende a súa formalización e terá vixencia ata o 31 de decembro de 2024.

Décimo terceira.-Transparencia e bo goberno

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes consenten dar publicidade dos seus datos persoais e demais especificación recollidas no presente instrumento de colaboración o Portal de Transparencia e Goberno Aberto.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

Décimo cuarta.- Divulgación da existencia deste convenio.

As partes poderán participar na promoción, divulgación e difusión das actividades e dos resultados obtidos coma consecuencia da execución deste convenio mediante a correspondente publicación nas súas páxinas web e demais medios de comunicación.



Décimo quinta.- Protección de datos persoais

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, de 27 do abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se deroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable polo IGVS coas finalidades de levar a cabo a tramitación administrativa que se derive da xestión deste convenio.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas en <https://www.xunta.gal/información-xeral-proteccion-datos>.

Con todo, determinados tratamentos poderán fundamentarse no consentimento das persoas interesadas, reflectíndose esta circunstancia no propio convenio.

A referencia á publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia. Así mesmo, poderán ser comunicados as entidades do sector público institucional ca mesma fin.

As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/informacion-xeral-proteccion-datos>.



En sinal de conformidade, asínase o presente convenio na data sinalada na sinatura electrónica.

Presidenta do IGVS

Alcalde de Mondoñedo

Ángeles Vázquez Mejuto

Manuel Ángel Otero Legide

